



Iesus guarit deux Demoniaques, permettant aux Diables se mettre dans des pourceaux, qui se sont iettez en la mer.

VAND Iesus fut passé à l'autre bord du lac de Genezareth, deux Demoniaques sortis des cauernes luy vindrent au deuant, qui estoient tant terribles, que nul n'osoit passer par là, lesquels s'écrierent, disans : Qu'as-tu affaire avec nous Iesus fils de Dieu? Et vn qui n'estoit point vestu, qui demouroit aux sepulchres, & qu'on ne pouuoit tenir ny en ceps, ne par chaines, courut à Iesus, & se ietta en terre, & luy dist en criant : Je t'adiure de par Dieu, que tu ne me tourmentes point : car Iesus commandoit à cét esprit malin, qu'il sortit de cét homme, qui de long-temps estoit tourmenté és deserts. Et Iesus l'interrogea, disant : Comment as-tu nom? il répondit, Legion : & le pria qu'il ne les enuoyast hors la contrée, ny aux abysses, mais dedans les pourceaux : & les Diables entrèrent és pourceaux, & le troupeau se rua du haut en bas dans la mer, & fut estouffé. Les Porchers fuyans racontèrent à ceux de la ville ce qui estoit aduenü, lesquels sortirent, & virent l'homme qui auoit esté guarý assis aux pieds de Iesus, & eurent peur ; & le prierent qu'il se retirast de leur contrée.

S. Matthieu Chap. 8. S. Marc Chap. 5. S. Luc Chap. 8.